



PANDANGAN dari atas keadaan tanah di saluran tangki simpanan air yang pecah dipercayai akibat hujan lebat di Jalan Tasik Tambahan 3, Taman Tasik Ampang dekat Kuala Lumpur, semalam.

24 rumah dilanda banjir lumpur

Oleh ABDUL RAKIS SANTA

KUALA LUMPUR 20 Dis.

- Satu kejadian tanah runtuh berlaku apabila sebuah saluran paip tangki bawah tanah yang membekalkan air di kawasan perumahan Taman Tasik Tambahan, Ampang dekat sini pecah hingga menyebabkan 24 buah rumah di situ dibanjiri lumpur.

Dalam kejadian kira-kira pukul 7.30 pagi itu, sekurang-kurangnya tiga buah rumah mengalami kesan banjir lumpur yang paling teruk.

Bagaimanapun tiada kemalangan jiwa dilaporkan dalam kejadian itu.

Ahli Parlimen Ampang, Dr. Rozaidah Talib berkata, kejadian tanah runtuh itu adalah kali kedua seumpamanya berlaku di kawasan Taman Tasik Tambahan, Ampang.

"Walaupun tiada kemalangan jiwa dilaporkan, saya khawatir sekiranya terjadi lagi tanah runtuh di kawasan tersebut apatah lagi dalam musim hujan ketika ini.

"Saya berharap agak pihak Syarikat Bekalan Air Selangor (Syabas) dan Institut Kerja Raya Malaysia (Ikram) segera membuat siasatan

dan mencari jalan supaya kejadian lebih buruk tidak berlaku," katanya kepada pemberita di tempat kejadian di sini hari.

Utusan Malaysia difahamkan, hujan lebat yang berlaku sejak beberapa hari lalu menyebabkan tanah di kawasan bukit setinggi 30 meter yang menempatkan tangki jenis 'rainforce concrete' itu menjadi lembut hingga berlakunya pergerakan.

Kesan daripada pergerakan tanah itu, saluran paip air tangki yang membekalkan 250,000 gelen air sehari kepada 2,273 penduduk kawasan tersebut pecah.

Seorang saksi kejadian, Mohd. Azmin Razali, 26, memberitahu, dia melihat tanah bergerak seperti kejadian gempa bumi diikuti dengan bunyi kuat hingga menyebabkan tembok penghadang konkrit dan beberapa pokok tumbang.

"Ketika itu saya bersarapan dengan keluarga sebelum pergi ke tempat kerja di Majlis Perbandaran Kajang. Tetapi dengan tiba-tiba saya mendengar orang meminta tolong.

"Saya keluar dan melihat tanah lumpur bergerak ke arah rumah saya dan jiran-jiran. Kamipun ke-

luar dan cuba menyelamatkan apa yang boleh diselamatkan," katanya.

Dalam perkembangan berkaitan, jurucakap Syabas ketika ditemui di tempat kejadian memberitahu, pihaknya kini menjalankan siasatan berhubung kejadian tanah runtuh itu.

"Buat masa ini, masih terlalu awal untuk kami membuat sebarang kesimpulan mengenai kejadian itu sama ada disebabkan oleh hujan lebat sejak kebelakangan ini ataupun paip bocor.

"Tunggulah sehingga kami dan pihak Ikram selesai membuat kajian barulah kami akan maklumkan punca kejadian dengan lebih lanjut," ujarnya.

Jelasnya, untuk sementara ini Syabas akan menutup kawasan tanah runtuh itu dengan plastik bagi mengelak berlaku hakisan sekiranya hujan selain menempatkan beberapa buah tangki untuk membekalkan air kepada penduduk bagi kegunaan harian.

Sebagai langkah keselamatan, Syabas turut bertindak mengosongkan kandungan air dalam tangki tersebut bagi mengelak kejadian lebih buruk berlaku.